

寄庵詩文鈔

余壯未學詩戊申病假始學爲詩有赤霞山房草一卷
東游草一卷再出謫戍歸有北征草一卷潭西草一卷
南還草一卷家居有雙琴山房草抱孫樓草西游草各
一卷最後又出詩皆以潭西名若干卷已刻於濟南請
養後刪存爲寄菴詩鈔八卷并續鈔十卷續附十一卷
皆刻於昆明擬分爲初二三四四集今丁亥詩當爲第
五集余年八十有一矣學爲詩四十年矣自視之無一
可言詩者顧謬爲遠近諸友人所不棄而余一生歡愉
悲憂之致亦畧備以見焉於是復以數言弁五集之首
潭西老人劉大紳

寄菴詩鈔續附卷十二 丁亥

雲南劉大紳

夢王秋水

落日下曠野郵亭杳莫到忽憶前邨中故人性枯槁不見廿載餘相見恨不早跪拜未及終匆匆索詩稿舊帙忘攜持思量起新草父老爭來看共說使君老老亦何足悲悲難推恩保情長夢偏短天雞一聲曉

雪 正月十九日

塵容俗態片時消上界神仙亦自驕一氣清空能有幾萬緣滯滯最無聊詩如我輩多藍本畫到天工只白描

可惜梅花歸閬苑香風不駐浣江橋

妙應寺

昔日尋梅處今停老友棺死生猶旦暮魂魄遞悲歡地
入空王界人同曠代觀匆匆夢中至祇是說平安

檢板橋畫松有作

故人爲壽輒千金赤手歸來病又侵留得板橋松樹在
一時聲價長園林

思卽園

烏鵲猿猱悲鳴晝夜招呼才鬼出重泉下爲人不歸爲
長相思強自寬解爲遠別離別離之悲甚於死亡少壯

或可老淚浪浪請置子詩請置子文不誦不讀可無云
云骨肉易消詩文難滅往復悼歎何時始絕

妙應寺撫卽園柏

如此詩人如此命蕭蕭古寺竟停棺不吟長使百靈喜
未葬生愁羣盜歡奠酒杯空疑共飲招魂神降枉相看
慰君差幸雙栖鶴勝似山村聽唳難

卽園分贈二鶴次第死於盜與客矣

壽張雲卿母徐孺人

壽母須得洪鑪丹刀圭入口生羽翰飛駐崑崙絕頂上
孫曾弈世常承歡肉芝亦是長生藥蟠桃結子不輕落華
山翠水勤取將戲看海水及城郭日月如丸復如梭百

二十年容易過幾人長與誦天保顧我久經廢蓼莪張
生雲卿廼有母依恃岫嶙若天姥親前笋鯉開宴陳子
念咳華詩句補雲卿本是滇詞人含宮咀徵娛終身瓊
瑤琢來每嫌假肺腑流出皆爲真同時元白盡壓倒異
代曹劉共稱好浪徵泛求是何心毋乃竟忘我衰老我
固未敢辭不文豈能爛漫如彩雲明知龍虎難並駕况
又蚓蛇强張軍一箋捧歸歷多日遙想芍藥香滿室卷
帷倘酌婪尾酒姑博微笑莫深詰

葉映堂招飲家園同徐勉齋張亮工高益生戴古

村家弟熙敬

梁南那得古平泉直是苴蘭小洞天
大有人來時下榻
劣如我至亦開筵
雄芭少此談經地
軾轍勝於聽雨年
十日相留情未倦
不須急急整歸轡

令子翛然遠俗塵閒雲歸鳥自相親
能詩尙是尋常事
愛石纔爲磊落人
掩耳不聞原有意
掀髯長笑更無倫
東坡死日君生日
識得前身與後身

楊蓉渚明府招飲客館同王樂山先生及楊丹亭
李古坡楊嶰谷張葛民楊錦橋阿象山諸子卽
席賦詩分得松字

人生願如千歲松
未及百歲先龍鍾
對酒易悲若有觸

分吟難就殊無悰
昆華本是舊遊地
晦明風雨紛過從
射蜮媚狐迹久滅
造物於我無不容
邇來應求廣聲氣
鸞鳴鳳噦聞離離
西鳬徙南入浩渺
與鷗盟水尋微蹤
霽月光風落眉宇
瓊林瑤樹森心胸
老夫假如昨日死
才子那得今相逢
客館開筵慰衰朽
衆賓同醉春光濃
中間忽憶盛年友
白屋人卽黃上封
笑渠谿邊長桃李
怨誰城上栽芙蓉
人事天道兩莫測
一士竟使輸羣傭
感此如何不長醉
文章事業奚所庸
未能會哭且會飲
顛倒全仗扶短筇

答戴古村

紅壓青藜寸厚塵
苴蘭到日不尋春
士皆踴躍酬知己
我自荒涼哭故人
雪羽翩翩迷鶴步
虹光冉冉化龍津
撫棺舊歲吟梅處
更有何心絮酒陳

萬里遊歸一布衣
同來蕭寺淚頻揮
才人富貴原無分
名士詩文亦復稀
或假多年猶慰藉
不教人住漫依違
欲因寄語蓬萊客
相與披蓑坐釣磯

玉案山墓祭同第五弟

不覺春秋易匆匆
一祭歸弟兄如在抱
魂夢尙牽衣

是夜

夢碑版鄰家盛
雞豚客邸稀
牛眠云未得
馬鬣欲何依

時浪穹諸生從

祭云非吉地

再過鄰家看牡丹

每恨詩家少別裁西鄰扶杖屢徘徊三春草木都移氣
二月烟雲最遲才酒不須傾人自醉花如未放客誰來
蓬門亦欲迎車馬笑問何年始一開

翊清招飲花下

無新樂府負名花邀坐春風興太奢並世神仙兼富貴
一時樓閣遍雲霞紛紛遺事談天寶娓娓清言溯永嘉
入夜深愁風雨至好將步帳幾重遮

清明前四日同第五弟過乙觀兄弟園中看麗春

花

短竹籬邊大酒瓢。秋霜到處每相招。春燈讀罷閑情賦。
欲倚佳人和玉簫。

姚魏色香天下聞。重樓疊閣種紛紛。誰知掌大荒園地。
開遍春風五色雲。

惜枝憐葉並肩看。倦坐黃沙石井闌。正似對床尋舊約。
兩家兄弟有餘歡。

行將鞍馬出山阿。細雨斜風寒食多。岑寂郵亭空夢想。
牆陰何日又婆娑。

出門

歸來纔喜卸風塵。再去湖山亦笑人。自古虛聲羞處士。

言集卷之三
祇今折節誤名臣投林小鳥無垂翅縱壑長魚有損鱗
盲左腐遷皆自取不如閉戶養吾真

同楊蓉渚楊懈谷魏允士過劉園

故交零落半此日欲何之偶得看花處還如化蝶時
華春色易稀阮野情移解事園中叟殷勤索小詩

過卽園

騷雅埋黃土園林一再過呼之可能出已矣復云何
曉事楊雄少愁懷杜甫多舊詩猶在壁不忍更吟哦
謫仙今不死吾輩至如歸地下容才子人間阮布衣
挂琴絃盡絕立鶴影皆稀長恐遲遲去清霜向夜飛

上卽園家回過岷山草堂芍藥正開主人未歸飲

後留詩

風雨留人住名花有酒杯狂歌原有興痛飲却生哀昔
爲將離贈今逢再至開誰能招李白捉月更同來

花枝遲客醉不見主人歸緩緩耽風韻遙遙駐日暉詩
才輸謝遠相業笑王非路上如相遇停輿賦式微

又戲爲二絕句

流鶯漸次送春回挽住韶光爛漫開却憶津梁風景好
萬花會裏相公來

春陰借與護雕闌社酒村歌強自歡誰信揚州明月夜

名花只愛美人看

歸輿中作

夕陽歸鳥疾若爲促輿人城郭行相近却堪望不真定
知泉下客重見夢中身酬倡如平日詩成倍有神

夢張金門

八尺繩牀共被眠花枝有影到牀前
半輪落月收將去仍向殘燈夜坐禪

送張葛民重之甘肅

怨聲歇處頌聲起久聞官清甚於水民有父母官無父
麻衣竹杖返鄉里兩地相思夜夜夢此心難忘舊賜履

朝廷設官本爲民不知何日互切齒官謂民頑梗教化
民謂官貪忽治理冤憤鬱積干天和水旱相仍疫癘比
飛蝗在天魃在野虎不渡河鱷不徙閭閻擾攘又不止
循吏家居引爲恥奮然再出非爲已億萬生靈有所恃
駕輕就熟得騷駟烽烟不愁爨炊喜甘肅雖延暴秦祀
同是唐堯繡壤裏治亂在下實上使若使人人學優仕
龔黃召杜垂青史文教敷時武備弭齊捨干戈秉耒耜
斯民之生弗之死我獨何心不如彼吾門迂疏世所指
入官往往值非毀要自清白不譎詭近有二楊國翰與
紹建
一李士林
爭學循良遠貪鄙吾子又復嬾厥美周道如

砥直如矢雍梁雖隔不逾咫尺家貧一時少鞭筆與我相逢滇池淚歡合悲離逆旅底人禽義利守宗旨崔蒲潛消可屈指小試何嘗辱國士貴能慎終如慎始吾子勉之其行矣

楊蓉渚明府重招飲并令畫史圖王樂山先生及
余形醉後賦謝

不見黃叔度三日卽爲久比於顏子淵東周可尙友名士互標榜何曾辨苗莠東漢風尤熾毀譽肆其口黨禍延國家盈廷誰任咎黃生無事功德立名不朽人倫鑒賞真受之顏弗厚今幾二千年寥寥莫能耦誰知隴蜀

間直出俊及右學爲多士模仕作衆人母偶然賦行役
重厯舊畎畝結交得佳士昆華近未有論人猥及予便
欲千金壽竭來苴蘭城一見輒稱叟招飲竟至再受寵
驚而忸讀畫煎茶前賡詩設醴後清言蘊多理深至遠
塵垢不覺廣陵花香氣滿戶牖定知異日夢依依若聚
首乃復召左史尺素貌老醜瑯琊尙克富不才廁下走
屏風那堪汗臺閣信多負拜謝徒煩言亦聊效吾手願
君無弄藏早與雜薪樵

爲李漱芳明府題畫

不待雁鳴蘆荻秋先從紙上寫離憂衡山望斷嵩山遠

夢繞中峯百尺樓

出遊

不知何事背奚囊，祇覺狂夫老亦狂。
畏官街嵌石滑，偏憐野圃繞花香。
懷人遠渚生春水，弔古空山駐夕陽。
翁仲無端相對泣，麒麟冢上月昏黃。

題松菊圖爲蓉渚明府

伊周不撫松，孔孟不采菊。
大節何嘗墮，暮年志彌篤。
淵明非沾滯，斤斤事草木。
先人代仕晉，恥爲宋臣僕。
斗米不折腰，借以遂初服。
松菊固寓爾，三徑匪徵逐。
何爲後世人，束髮志利祿。
一官矢終身，白頭總錄錄。
遑問鄉園

中菊殘松已禿希陶如有人超然遠流俗肯爲浮名牽
夢夢待神哭何況抱道者身善世亦淑雲出時雨降鳥
歸空林宿進固邦家光退豈林澗辱作圖如賦詩言志
信之夙吾輩日過從感此愼幽獨

過江西會館

橫分金碧地樓閣出雲間不惜萬家產祇求終日閒客
來僧入市人去鳥歸山拂壁無紅袖夕陽空手還

詣真慶觀看芍藥

昔日看花處仙人日白頭滄桑銷甲子草木記春秋不
信還能到長吟自欲留一尊千日酒更與公散離憂

言者言錄卷三
答戴古村

亦知住此得相親老病山中藥物真公子幾曾無食客
玉門原不少伶人藉言修史學何陋若欲傭書家未貧
來日停鞭歧路上歸期先已告東鄰

同戴古村朱麗川過湖心亭

題詩尙記舊憑闌不信溪山已改觀水蹙微波新鴨亂
岸橫枯樹老烏殘屐裙自作空花視池館如從古畫看
惟有依依橋畔柳送人離別晚烟寒

哭王玉海孝廉

王李曾開白雪樓彩雲今又見南陬文章乍釋才人恨

富貴終將志士讐埋玉九泉魂渺渺停棺一屋恨悠悠
去來杖履無聊甚哭罷滄溟哭鳳洲

寄謝石瞿廣文

王謝才名世並傳昆華與我久周旋如何賭墅圍棋日
不見流觴曲水年苜蓿亦難償舊願芙蓉可得似新編
冷官終勝無官好戲著斑衣母膝前

讀卽園遺詩

中壽不能待空言徒滿車古人先有此曠代後誰如身
老窮荒外編存疾病餘每吟懷我什新鬼嘯吾廬

勝因寺看芍藥

不雨不晴候藥欄花正開未經人到處都有蝶飛來狂
客誰能賦禪僧盡學栽留春與消夏此際且徘徊

題李漱芳明府秋桂課子圖

賢才世一出天下待以理養成宰相器端自正蒙始棟
梁基萌芽稼穡務耘耔力田與樹木同一保厥美晚近
父母心姑息愛幼子玩好前庭盈詩書高閣度錦繡橫
被身經綸茫無以縱然列槐棘徒自辱金紫昨日見李
侯乃知天下士晚年得佳兒不爲好弄喜岐嶷見頭角
問年未毀齒更使學旣殖庶幾出而仕姓名廟堂重功
德草野被繩祖復貽孫龍門矗天起他人幸得一卽將

鳳麟擬侯家至再三聯翩繞床第世事紛何求輒然笑
憑几一院桂花發侍婢抱相倚好友爲作圖天香染滿
紙強我題小詩筆硯一無恃疊書異獐字適爲賓筵恥
架上安足珍相看若敝屣

慰卽園雙鶴

謫仙化爲元鶴飛丹邱四面滄波圍園中雙雛翮未長
清唳不止將何依此間飲啄卽蓬島瓊漿玉粒療渴飢
樊籬喧爭衆雞鶩庖人早已謀鮮肥燕子年年倚松棟
梅花歲歲鄰竹扉鶴兮何獨不如彼夕傍娥影朝羲暉
仙人固是有情物未及千載當言歸緱山重逢王子晉

華表再見了。令威舊時城郭。或未改。山邱華屋休歎歎。
鶴亦毛質變。蒼白迴風對舞。新羽衣。鄉鄰老叟競指視。
松巢胎育。聞見稀。仙人於此。豈不樂。故園詎肯輕相違。
人間悲歡。自有數。生死得失。誰是非。惜哉草堂亦籠去。
老淚空向孤冢揮。

見王心觀言有穆東瀛寄書檢之竟不可得悵然
賦此

衰年久別。易生哀聞。有長安尺素。來不是空函。徒寄淚。
偏如故緡。竟成灰百端。只好從人問。一札無由付使回。
他日更尋何處。寄魚沈雁。杳兩疑猜。

哭伯玉亭相國

老成生死最關心不獨恩私欲鑄金
驟託大星依日月長留遺像在山林
挽歌一夕終難遣史傳千秋尙可尋
爲問門牆多弟子青山有穴孰先臨

自志局辭歸

殘年疾病日相侵夜夜鄉鄰入夢尋
論世知人千古事離生別死一時心
不辭遠道關山隘第恐荒園草木深
歸聽插秧歌正好况逢樵唱出雲林

歸後三日門首閒坐卽於其間午飯

飛塵相趣四旬還愛入山中不出山
竹樹蕭森賓客少

籬落豁達犬雞閒我方握扇清風底人正扶犁赤日間
勞逸雖殊情各適遥遥沮溺可同攀

家家豆飯餉耕夫我亦兒孫進一盂勝似承筐來坐右
漫勞布席向門隅李倫豪俊猶能賦逸少清閒好作圖
可笑何曾難下箸萬錢一食未歡娛

爲李淑芳明府賦貞孝節烈女李氏

河南天中風氣殊杞又祀禹之名都誕生哲人著載紀
閨閣亦復鍾賢姝李氏女子得未有守義不言人盡夫
願化蝶魂繞冢樹羞從鴛陣浮池隅終書繩上萬香字
笑視梁間孤燕雛近代節義時遜古名教全仗巾幗扶

女心應是赤董質百日烈焰飛洪爐尋常斤斧不稱意
鎔成利劍稱湛盧魑魅魍魎走相避妖腰亂領甘爲屠
禮家謂女未成婦殉夫義不聞通儒執雁升堂若可貳
二臣藉口憑黥汚但以心許猶難負况乃名聞豈容渝
上壽中殤等一死死日生年爲世模 朝廷褒許表宅
里一代憲章垂典謨曲士卽有喙三尺誰敢附朽還黨
枯昨我整裝欲歸日李君授啟藏行厨當時傾心欲倚
馬今朝盥手思操觚自以涓流附河漢不妨美玉容珷
玞惜哉生卒守旌蹟年月時人忽諸壻名母氏尙難
志况復詳及先舅姑作歌鄭重仍太息如此女子何可

無若不輸金鑄作相定當買絲繡成圖

重賦貞孝節烈李氏女

嗚呼女子何可不識字不識字豈明大義讀書萬卷難
爲功天生至性與人異杞縣李家有女子貞孝節烈一
身備幼失母氏無可恃恃有伯母已出視少小容止卽
淑慎長大深閨絕兒戲其祖家居教兒孫要令聖賢不
相媿女奉箴規如諸昆有疑質母早辨志芝蘭蕭艾並
生育鴟獍鳳麟各位置載籍勸懲原兼收如鑄神鼎畫
魑魅入山不使逢不若女每見之怒且詈一寸繡鍼嚴
鉄鍼纖指奮勇力爲刺地下深藏人死魄一時受誅無

處避伊吾小子誰能之甚且勞心學作偽盡得鬚眉如
此女濟楚冠裳見人瑞宜使終樹閨壺儀夫婦偕老子
孫施造物不留少缺陷豈非室家大快事云何夫病久
不歸一死竟難得生待以未成婦入翁門道旁觀者皆
墮淚卽請立嗣識其大黽勉終身孝養遂高堂直如兒
未亡有婦如此老有寄辛勤五年姑卽世附身附棺誠
信治擗踊哭泣殊異常是夜懸梁已自縊有司上聞得
帝俞栗主奉祠百千季令弟作傳無溢詞焚香拜讀
望莫企嗚呼女子年才二十六父則公讓母孟配生於
杞縣歸睢州馮家之子名居易穀不同室死同穴隴頭

女貞木蒼翠夫死不死姑死死節烈還能濟仁智賢母
亦知女必死育女知女匪擬議祖訓母誠兩無忝萬古
綱常未墜地祠堂况復在睢州文正公母廼與比世間
縱多褒祀人似此楹楣恐無二我輩心肝有真血淋漓
傾瀉非妄費回頭却笑駢驅家險被公等鹵莽棄

家居

五雲深處揖仙班自計頭顱久已殞交友無人盟白水
隱居有客賣青山穀菜平分田百畝兒孫各住屋三間
琴囊劍匣同安穩盜賊潛藏犬亦閒

四月

竟畏南風不出樓羊裘懶著著狐裘每逢四月常憂病
可得三壺暫許遊海島與人猶自遠神仙於我又何求
白雲一片青山外借汝閒銷萬古愁

查守樗司馬出詩稿相示讀未竟卽賦歸爲長句
寄之

何但名都舊世家前身海上一仙槎宦情清似半江水
詩思秀於三月花未及終編如有失誰能別路不長嗟
他年更向蓬山遇願與鞭笞白鹿車

五日

生兒何必齊孟嘗門下食客三千強雞鳴狗盜小有用

豈能西拒秦虎狼暴虜志欲南服楚不返懷王弱項襄
賦騷抱石屈原死江魚腹餒江流長忠魂叫冤徹帝座
楚存三戶秦必亡江東天生一項羽入關殺嬰火咸陽
雖不爲帝大快意白晝衣錦歸故鄉羽復楚譬如原復
至今猶爲原悲傷十丈龍舟競渡日絲纏角黍沈沅湘
爲問初度皇攬揆可曾高門自掄揚滇南萬里本楚屬
艾蒲亦復懸宮牆秉彝蒸民好懿德何但劍虎除不祥
可笑衣冠沿齊俗千金爲壽歌無疆

雨

銷夏如無策殘編觸手忙孤村今日雨一榻昨宵涼

草滋橫砌濃雲壓短牆
旧家最懽樂插稻不枯黃

楊丹亭孝廉惠印竹杖

乞我郭璞一束筆花不能生
禿何恤乞我錢繆百石弩
潮不及射折無補天生我輩
須能文如不能文即能武
絳灌隨陸身兼之將相少年
唾手取匆匆毫螯望八虛
鄉村老守窮茅廬偶然思及
好山水遠道跋涉無舟車
筋弛骨弱神不王借言鄉朝
禮用杖種藜斬籐經多年
癭勁古拙詡善相君從何處
得此君夷道未通稀見聞
張騫遺誤漢武帝徵發諭告
紛如雲萬里競隨蒟醬致
愚民豈識聖王意血流道路
空淋漓不似湘筠染如淚

終以異物長見珍況又瀟灑無風塵
葡萄首蓓爾何益移栽御苑勞使臣我
朝懷柔德教遠漢夷交易自往返一條
綠玉凝蒼烟惠好友朋達繼絕家園曾
栽青琅玕如人面目人面竹名交相看遐方
初來是爲客置之座右終身歡不讀遷
書不太息何至化龍留不得風聲靈壽
同扶持直上蓬萊與有力

夏日

年年當夏日意氣不飛騰
捫壁未逢蠹垂簾猶見蠅
長望山有雨空說室如水
差勝趨東國侯門狗亦憎

白首

插遍青禾便種魚山中今歲得安居每憐少日惟呼酒
何可衰年不讀書功業蕭曹還遠望文章沈謝亦難如
千秋尙有無窮事白首茫茫問太虛

熱

避熱如逃劫火時造水長夏語堪疑蓬萊且向神仙問
世上炎涼知不知

讀書

不煉金丹不坐禪讓人成佛亦成仙癡心只愛深山裏
更讀吾書二十年

食瓜

仙人閣畔白雲遮
愁緒紛紛緝亂麻
長記吾親微雨後
攜兒買食鄭園瓜

垂簾

逐隊蠅飛欲蔽天
惱人直到小樓邊
簾垂一幅瀟湘竹
宴坐空山聽澗泉

詠粵東竹簾

竟似鮫人水織綃
精簾伴爾遠塵簷
不曾觸手初無迹
但與橫牕便自搖
隔斷蠅蚊聲擾擾
聽殘風雨夜蕭蕭
尋常篾片何須數
粵海攜來道路遙

野望

炎炎長晝總無聊獨上高邱野望遙百代幾人兼將相
半生此地一漁樵欲焚筆硯詩情減不蓄樽壺酒興消
昨日還從官市過閒中恐有客吹簫

答客

不病何嘗苑相逢午睡餘避人無宿債讓佛得真如飲
起僊僊舞吟成草草書溪山同一笑於汝意何居

賦謝陳尹齋爲寫圖像

陳君用筆如用鏡照見人影毫髮無不映陳君用紙如
用土搏成人形見者皆起舞造物遺我身陳君傳我神
非假亦非似全然得其真我於繪事了無得有如盲臣

眼墨墨遍體凡骨那宜仙寄興欲上崑崙巔山中三秀
蒸雲烟服之可不老一千二百年一笠一屐一藤杖衣
裳褴褛偃僂樣又欲長作畫中人衆史含毫坐相向好
手出袖中有君卽有我飲酒賦詩無不可使我真得逍
遙遊全仗陳君般礴羸是時我年七十四游戲虛空有
餘地東烏西兔去幾日犬馬齒已八十一畫上之人今
昔殊別開生面重作圖能事迫蹙世何敢意匠經營見
亦罕丹青不憚煩金碧同一覽飲我煮美酒食我炙肥
肉精神煥發不拳曲真迹又得第二幅朝衣朝冠雅不
俗何必破笠戴頭屐著足酒人詞客日徵逐狂吟草書

塞滿屋大家欲歌又欲哭我何人斯有此奇絕福兩圖
直十萬報恩過一飯君不見頰上毫亦太勞眼中金彼
何心

不曾

不曾拈筆硯紙上本無詩欲向虛空索長愁鬼怪疑山
中稀客到海外少人知一笑成何事繩床倦臥時

有感

上下幾千載古人多謬人名爭荒冢鬼淚灑廢祠神險
怪能驚衆粗豪易失真平生從所好何至歎迷津

其二

毀譽分今古喧闐不足聽時人生有力故鬼死無靈衆
口後來有多歧前輩經平心讀舊史小屋一燈青

其三

論世真非易方人更不賢英雄閒說鬼將相老逃禪俎
豆隨時改聲名振古傳長途三萬里捷足讓相先

城中哭思振弟

人死無人報憑棺下淚遲弟兄成短夢身世付殘棋下
壽本非夭衰年偏易悲蕭蕭白楊樹無那斷腸時

遣愁

遣愁排悶夜燈殘南斗光聯北斗寒上下招魂猶翦紙

縱橫墮淚已堆盤生人自爲多情累死鬼何知一夢難
悟到無終無始處行雲流水只閒看

題戴古村詩二集

不待求人序傳鈔自一時名成蠻貊許境變鬼神窺李
杜原先覺張王亦後知騷壇零落久好仗力撐持

題李卽園遺集

多病祇餘骨長歌尙欲仙斯人何處得此世有誰傳作
鬼竟埋地爲星終在天從今圖捉月更不畫凌烟

讀張船山詩集

寄菴八十鬢如絲弔石哭梅埋鶴時也似隨園留不死

南風煮酒讀君詩

自題詩卷

世間何物號神仙詩集編成八十年無處歌呼無處哭
有人笑罵有人憐不禁飲興消於昨祇覺吟情勝似前
榮辱升沈原偶爾名山頂上閱風烟

憶往

忽憶此生輕別離宦場草草太無奇敝衣點染萬人淚
敗簞收藏千首詩喬木幾家園故宅烟雲何地護殘碑
餘年更作東游計遇著兒童恐不知

華山昆水近敖遊興馬年年亦不休天地未能迴白首

鬼神何事轉青眸
突來風雨沈詩社
老去鶯花失酒樓
幸有遙遙千古月
一時還照古梁州

清吟

清吟與美睡二者得兼難
睡足還書夢吟成豈拜官
雲山千里杳燈火一窗殘
好假龜著決終身得所安

熱中人

天熱猶生怨人偏愛熱中
一腔皆烈焰六合自清風
勢與蠅蚊逐心兼將相雄
焚身祇自取莫恨阿奴攻

清涼界

醫熱無他藥清涼二字佳
氷藏寒士井雪卽冷人
鞵第

使風來座常吹月入懷青蓮佛世界早已屬吾儕

題荷鋤圖

難得言歸尙有田荷鋤曾寫我當年老來不改圖中樣
蓑影參差笠影圓

長生

長生不死竟何如回首全非少壯初酒價賤時偏戒飲
筆鋒殘處却強書狐狸慣戲南山豹鯁鱗爭嘲北海魚
舉世幾人知大小塵編錯拾老莊餘

夜中不寐有感偶成

清晨起坐到黃昏風雨聲中靜掩門作字僅餘形影在

稱詩祇有性情存人聞老病輒先笑自顧迂踈難細論
涉世方多無處學移居恰好得山村

老至名心未肯降如棋勝耦劍思雙自從車馬臨齊魯
何異衣冠出冉駝季札居然遊上國鄭僑未及陋蠻邦
回思四十年前事燈火窺人來北窗

倦臥還思五岳遊飄然到卽上高樓真形久向胸中貯
變態時從畫裏收不少風雲來下界儘多碑版倒前頭
欲呼舊侶逢搖落文酒場中少應酬

多年厭聽轉車聲落日深山路不平未必無心同木石
誰能有夢到公卿金多尙許人諛墓草長曾憐客廢耕

羊祜二碑癡絕甚空教鄒湛淚縱橫

夢保保孫

夢底攜孫子徘徊古寺前暗林吞夜月幽澗吐山泉說
劍人能俠談詩我欲仙歡娛不竟夕聚散若雲烟

樂趣

樂趣無如夢蕭然一枕幽強尋疑路絕偶得與天遊仙
境何勞問癡人不解求將醒仍欲睡片月在高樓

愁

竹雨松風非惡聲乾坤何事喚愁生此時缺陷知難補
當日團圞看太輕自信庸人宜厚福誰憐美報是癡情

仙家眷屬茫無處縹緲樓臺說玉京

詩

奇人奇境得奇詩一室孑然何所爲長吉出遊心有血
安仁閒賦鬢如絲海中市見乘高興嶽頂雲開鑄偉辭
況是良朋相遇處風雲會合異平時

千古遙遙取友嚴名山大澤樂難兼第能五岳神皆受
儘可三墳手共拈將相屠沽同不厭英雄兒女又何嫌
閒中歲月吾今老且與桑麻守里閭

瓶中白蓮花

香風十里碧波恬采出江干日不炎如此玉人何處貯

金屋不捲水晶簾

刻畫難成玉一枝水中影向鏡中移香來夜半尋難著
正是西樓月隨時

烟水遙望深復深四圍荷葉綠成陰南風不送扁舟去
空負相思一片心

六言

爛醉全無興致閒吟那有工夫客去不妨渴睡事來且
自餽塗

許多

許多白骨委蒼苔名士原非天下才但解吟詩兼飲酒

便夸婦女及嬰孩風流儘可娛絲竹事業誰曾出草萊
王猛不生諸葛死茫茫千古首空回

底用

底用抗懷千載上國初諸老卽堪師朱王施宋雖文士
壇坫風流自一時

卿相才猷半隱淪吾謀不用遂無人著書亦是名山業
埋沒空箱寸厚塵

後來科目盡英雄別有香奩續國風爲問幾時過漢水
師涓指下譜絲桐

性靈名是性情導言志永言何所歸悞盡蒼生非一世

但談脂粉使神飛

題卽園詩集

留得蒼華數卷詩生千載下尙相師
虞前王後人多少
並世纔逢一子期

浪說雲泥隔幾重詩人自古作雲龍
去年死抱船山集
翰與蓬萊占一峯

生成怪物妒風雷每到龍門輒暴腮
天上謫來天上召
玉皇至竟是憐才

鯨背虬身天路遙錦囊馱去駐丹霄
多情更訪芙蓉院
袖與羣仙譜玉簫

戲和泮池重臺蓮花

並消猶自各西東
齋出頭時拍泮宮
聚類耽爲君子獨
有情不似小人同
差池影落清清水
重疊香生澹澹風
相約采芹隨采此
歌聲雙發看誰工

有豺

誰招此物來
虎豹亦生哀
村落空牛馬
邱陵足草萊
爪牙真利器
貪酷卽雄才
德化知何日
三年竟不回
雉馴蝗不入
雞犬正熙熙
爾輩來何事
吾徒見未知
山多深窟穴
人少固藩籬
灑淚邑中叟
有豺書此時

讀卽園重訂詩集楊蓉渚評點本又題

柔情媚骨易魂消。子夜歌聲遍六朝。獨向屈原三楚後。
澧蘭沅芷續離騷。

肯在風詩變處尋。鵲啼雁叫寄愁深。昆明劫火燒難盡。
石櫨成時始輟吟。

自存自逸是良圖。不奈窮愁鬼亂呼。滿地酸風催苦雨。
竟無一字賦歡娛。

亦知壽世少文章。做到公卿黯不光。料理傳人殊早計。
更遲十載又何妨。

九戰秋風志未灰。皇天特特老奇才。不愁天老只愁死。
待到招魂魂可來。

藥爐參朮日相煎生氣微如一縷烟伏枕幾回長太息
知音欲覓到重泉

才子遠移金馬神眼空萬里見斯人時臨病榻聽風雨
一卷詩從膝上陳

千金珠出九重淵魚目紛紛不值錢何事道旁人按劍
一時欲殺李青蓮

不繡鴛鴦繡鳳鸞幾人丹穴眼曾看霎時還把金針度
作者固難知亦難

弓衣何但織蠻夷金鑄崖摩遠不辭萬樹梨身千樹棗
看他有福是何枝

結交我亦負青眸扶杖時登有此樓天下才原知不盡
夷吾鮑叔自千秋

蕭寺孤墳眼欲枯歸來一室夜研朱滴殘蠟淚成堆後
讓與岷峨嘗鑒孤

昔友

上帝生才亦甚難才人往往死無官黃泉碧落誰能問
老淚何時得一乾

人生各有百年期操望無多豈送癡盡得良朋同不死
萬山樓閣遍題詩

寄楊蓉渚大令

昆華相見憐衰朽絕代琅玕其品題七尺榻猶分上下
三層樓不判高低大年未肯輕相諗天祿無由直與齊
邂逅真難得如此劉義何幸遇昌黎

分門別戶亦常情大雅從來量不盈半點驕心無處見
一團和氣與人迎聞言直道佳何礙論世難將罵得名
久別幾時消鄙吝夢中差足慰平生

寄李橋東大令

居然富貴不驕人有客迎門犬亦馴竹徑將臨先脫俗
花蹊未到早如春英雄退步談仙訣參朮依方養病身
直上蓬瀛無別渡讀書靜坐是知津

寄楊解名副貢

夢回蒼洱遠身寄一壺中采藥無片草言詩有古風隱
原分小大心豈異窮通好挾刀圭去全收宰相功

得楊丹山寄書

六月初六日

親民縣令數逾千每憶循良輒慨然盡道才原非百里
可知仕又及三年轅門手版逐人後驛路口碑馳衆先
今年一書來浙水北牕跼脚不成眠

雨過旬尾看盆中蓮花

一盆碧水養青蓮
雨來看意渺然何似鴟夷高興在
輕舟汎汎五湖烟

又戲贈一絕

慣種黃花秋不閒
重門九日竟難關
又從別浦分香色
添得納涼人往還

鼉磯硯

雪浪金星作荷葉形

廿載前從海岱還
洞庭波浪湧如山
宦囊滿載鼉磯硯
穩臥船頭晝夢閒

亭亭荷葉未秋殘
擁出金星雪浪寬
醉後作書如斗大
淋漓墨汁不曾乾

便到期頤磨不穿
子孫實用可千年
端溪尙有零星石
款識遺留北宋前

食桃實

長有熏風拂樹枝，小園桃實已累累。
摘來雨後人方飽，望去烟中鼠早窺。
笑數看花如錦日，歡呼食果足豪時。
仙家遠說三千歲，曾許偷嘗幾小兒。

斲黃精

救饑何止濟凶年，久食凡人盡作仙。
方士固知多妄語，衰翁且當得真詮。
長饒土厚爭揮手，大擔雲深競上肩。
莫讓山中肥犬豕，從來靈藥不須錢。

周歲歌爲馮生豫菴作

馮生昨過我，喜氣見眉宇。
袖出紅霞箋，光彩日邊吐。
上

書生兒詩龍鸞勢飛舞風詠麟之趾先歌螽斯羽維男
必以百有子何但五且看得一士元愷繼而數去秋長
庚星爛漫燭天午其精流人間勝如獄生甫寢牀啼呱
呱聞聲驚鄰父嘉名象物錫好稱矢懸戶今年將試周
戈印任攜取不特慰乃翁行當繩爾祖大小兩馮君今
人直如古皇天固有眼爲善無不祐馮生質淳龐仁心
式周溥邇來入州城爲拯萬民苦上書廢寢食治安策
再睹活我涸輒魚扼彼出檻虎馮生此一心以恃復以
怙生理與生穢洋洋爾堂廡爾身壽而康爾子文而武
坐待成立時朝廷賜圭組及今四座滿咸歌百福尊

里言嗤老生要之固不腐歡然酌大斗毫釐迫童豎我
若能遠來鳩枹不辭扛抱兒入賓筵一看一飲醺

連日作書札憊甚

絕無干謁志魚雁急相尋往日山妻笑他年野老臨雲
烟馳夢入風雨寄愁深起視團團桂秋香已滿林

夜

風雨聲多夏夜寒孤村誰與報更闌不攖虎豹生無患
能掃蠅蚊病亦歡枕衾微嫌新夢短雲山長得舊詩難
忽然欲讀龍門史起視燈花已就殘

漱芳徵詩時以繡囊相贈用意深遠今乃知之矣

一絕句

不恥雷同豈有神
心肝嘔出一囊真
自從李賀乘虬去
只向墳頭貯月輪

意有未盡再成短歌二章

鍼神不製小兒袴
繡成詩囊見巧作
老翁得此慚愧多
詩家幾許成七步
何地無才才不殊
何才無氣氣朽枯
生氣真才少著落
強致遠大翻庸愚
千奇百怪力搜索
一句兩句忽飛躍
此物疑從天上來
天神心靈盡茫若
各不言功功與誰
背囊有奴應早知
背出鴻毛輕一舉
背歸九鼎行步遲

修月七寶補天石墮地猶然重圭璧零星收拾入囊中
撐持柱維願爲役順流一瓢亦多情山林體格都崢嶸
最惱相公借曲子紉成香匳希盛名此輩到門好婉謝
不妨兒童且笑罵卷却雲錦還天孫刀尺裁縫莫輕下

又一章

啟明招我出里門遠與古仙遊曠原曠原荒墳何足論
中有漢魏詩人魂險語奇文用不盡留待唐季佳王孫
玉樓一去又千載電鞭迅疾雷車奔書生膽魄休沮喪
左殫貳貽右猱猿虎氣銷磨劍鋒出炙肉行酒盈千樽
醉後得詩無與言呼奴好向囊中貯一壘一縷心血痕

拋擲塵土真煩冤

題馮清可總戶謠後

又見風人元道州
淚痕和墨寫民憂
傷心那有杜陵老
白髮閒歌相倡酬

清可來砦留宿鄰屋

白晝長愁天色昏
相思輒復到荒村
浣江橋畔石頭滑
一路茫鞋泥印痕

人物欽歎第一流
一杯濁酒且澆愁
猛然知是星回節
何處旌旗逐武侯

止君鄰屋宿秋光
積雨聲停一夜涼
紙上蘭花香不歇

又從桂樹賦餘香

過種菊山房

七月猶餘熱徒行欲解襟山房延客住秋色在牆陰

夢與諸同人賞菊賦詩禁用菊花故事醒後記憶
不全因足成之

種得黃花遠上蘭清秋再拜整衣冠縱令自古無人愛
儘許而今有我看詩既漫吟如此易酒仍頻飲亦何難
山中別抱閒愁緒懶醉西風晚照殘

觀刈稻

糞倒黃雲積作堆鎌刀肅肅向風開低頭不語忙如火

常恐西山送雨來

納稼田中樂事多
登場爲汝亦高歌
誰知穀賤傷農久
擔米求錢值幾何

山僧索書

二頃田邊小結廬
王家丙舍亦相如
秋成未了詠懷事
時有山僧來索書

秋海棠

乍喜清風八月涼
旋愁白露漸爲霜
燕巢泥落燕歸去
開遍牆陰秋海棠

木芙蓉

取徑芙蓉小苑餘柴門深閉野人家秋風寂寂秋江冷
綠竹陰中自作花

水蓼花

無雲無雨亦無霞一縷輕烟澹不遮金粟成堆埋桂樹
牆邊冷落水蓼花

木瓜

河干招遍故人魂倚樹時時灑淚痕比視待劉情不減
巢居易作木瓜村

卽事

村農穫稻忙不閒穀連藁積堆成山野老詠懷閒若忙

竹石清陰高且涼，江雲自來雨自去。不到穫稻詠懷處，
吾廬犬臥茅茨間。鄰家牛繫垂楊樹。

遠望

一村納稼未秋分，童叟歡聲入耳聞。更向浣江橋上望，
千家送餉醉黃雲。

坡頭

輕易出山山不深，還山始愧汗沾襟。坡頭若更高千丈，
淡盡人間往返心。

寄孫璞山

美人絕代勝夷光，綠鬢如雲變作霜。銀漢天孫空作婦，

青溪神女竟無郎，靈心織素成千匹。織手調羹斲一嘗，
我欲爲君詢娣姒。幾時才得事姑嫜。

寄戴雲岬

京師離滇一萬里，中隔黔山與楚水。鴻雁六翮摩天飛，
寄到去年書數紙。書中附及詩一篇，尙記犬馬今生年。
終悲黃金買駿骨，老將意氣橫幽燕。古今不少封侯相，
幾輩能將馬革葬。帝幸衛霍人奴之，對此如何不神喪。
愁來放膽聊高歌，市上屠狗英雄多。除却田光少知己，
叱辱柰爾勾踐何。人生窮達總由命，才子不死卽天幸。
卽園儵忽埋黃泉，草堂亦久嗟老病。我若有翅飛來時，

與君飲酒還賦詩詩成一家無遽喜酒傾千斛休深悲
君不見傳險版築棘津釣一夢再夢有同調匹夫貴爲
王者師負薪太守何足道

寄黃庶常象坤

蓬瀛隔弱水神仙始能到翰苑儲英賢不復收老耄
朝廷於此際用人固有道麒麟別胎育鳳凰殊哢莠
卷藏秘書少年得所造洙泗探淵源濂洛履堂奧辭章
乃小技淫靡極力掃養成宰相才上爲國家報邊隅尤
難得往往慮柄鑿吾子知無慚平生異俗好縱起錢與
李未必輕相傲終憐同學翁長使打鼙鼓

木芙蓉

續紛木末亦無雙
怨女移情倚綺牕
捨却蘭舟并桂楫
芙蓉原不在秋江

題馮豫菴畫蘭

離騷讀罷自沈吟
難得幽蘭話素心
頃刻香風來紙上
欲從空谷抱瑤琴

籜冠藜杖躡仙宮
秘惜春山一兩叢
揮灑麝煤烟雨外
千枝萬葉夕陽中

熙筌只解染燕支
篆籀空聞寫竹枝
草舊觀驚在眼
重逢皇象作書時

清芬未可得親疏月夜烟晨共草廬坐久依然聞不著
正如長與善人居

赴仁陶齋中看菊花

貪和前詩覺太忙似曾籬落警風霜桂枝深處正招隱
荷葉淨時猶納涼未必人原如菊澹却看蝶已爲秋黃
城東亦復多佳色何地移家築草堂

又五言二首

輕雲覆大道涼風來不已杖竹徐徐行從以弱孫子不
煩僕輿力遂至種菊里秋花異春花性情未易擬自非
澹泊人徒與園丁齒不爲風霜愁豈爲車馬喜蕭然一

室中如在空谷裏相對無一言兩忘我與爾酒瓢及詩
帙往往負知己此間難主客吾子且休矣

東村種美稻西村種嘉蔬稻成蔬亦長飽食歡有餘黃
花適逸興幽人樂蘧蘧秋風太散漫惡客來里間箕踞
視不足捆載將專車此豈關賦稅直欲同苞苴懷璧匹
夫罪何能無躊躇園中葵可拔門間蘭可鋤棄置不復
采爭友空遺書快哉甘谷中人盡遊華胥飲水成神仙
此外長歛歔

相思

最是傷人處相思哭落暉披殘詩稿在望斷夢魂飛祭

冢文無用藏山鬼有歸肺腸如木石老淚不輕揮

爲彭仁陶書扁曰小甘谷詩以紀之

采菊年年過草廬錫名始作壁窠書不題金谷題甘谷
知道石家秋興疎

寄李乙觀

一弓隙地土圍牆不乞人貲作草堂
甸尾城頭秋氣早
西風獨醉臥斜陽

彭仁陶寄菊

寄菊從何處相思日夜勞
秋風陶令酒夜雨楚臣騷
出處千鈞弩榮枯一羽毛
吾徒無事業且自養名高

對菊

秋林深處幾枝斜
千古風流向客誇
不是誤吟張翰句
散金應屬此黃花

荳蘭城外影重重
百畝閒田傲上農
不耐秋風多白眼
人前只說是花傭

長記河干臥病時
楊朱泣路墨悲絲
騷情酒味相關處
開遍千枝與萬枝

又一首代花傭解嘲

休因負戴笑行蹤
入市歸來日下春
一片閒情人不覺
黃花擔上闌秋蚤

由仁陶宅至令叔家看菊

白雲相約賦黃華移坐秋風更試茶
大隱曠懷如小隱東家佳色接西家
新泥壁綴苔痕少舊草堂連樹影斜
今晚不知何處醉得詩題遍幾牕紗

飲仁陶菊花籬畔

菊開餐菊卽神飛雁影蜚聲兩不違
石徑晴烟仍繞杖草堂曉露尙沾衣
悲秋興盡殘詩少望古情多熱客稀
我自早來還早去浣江流水待人歸

中秋夜放歌

中秋得見月勝於未中秋如何旣見後
仍然難解憂清

宵看月人何方無朋儔年歲不肯住死生付東流別離
可生不可死詩酒能哭要能喜無情有情呼明月天上
捨此少知己我聞月中有兔擣靈藥神仙服之便得長
生樂願乞千萬九分與千萬人各壽千萬年年此夜
望清光人與明月同團樂明月聞之忽大笑一年一中
秋尙難長相照顧後天地老天地恐絕倒第願汝與我
百年相思莫相左有詩有酒固自佳無酒無詩無不可
悠悠世上別離苦我心終是可憐汝

飲種菊山房

秋園如春圃滿目飛雲霞乍到疑爲錦繡谷人留仍是

山林家土牆四圍草堂背豆棚薯架輕相遮隱約性情
本平澹富貴財力空豪奢步帳陰翳猶自可珠環翠繞
胡爲耶歌闌舞倦不知夜毋乃貽笑殘籬芭蛺蝶栩栩
來何處雙翅同此秋色佳經宿枝頭不飛去知爾逸興
原如花時有異蜨來宿花間對之我亦穆然遠悵望秋水懷蘼葭
伊人何嘗在天涯金玉其音心不遐歸去深林聽暮鴉
豈若荒城吹晚笳

四十餘年媚幽獨山房曾許百回宿春烟秋月長牢騷
復有閒情種幽菊未見時相思丰標縈心目旣見氣味
如一家此中不復滋他族偶然醉後爲詩歌歡聲苦調

一一皆可讀更五百年秋風尙滿屋天隨子東坡老與
汝同師彭澤翁任從鄉里小兒笑枯槁人笑我不嘆
第願悠悠世上人萬斛水汲秋江濱洗盡眼中千杖塵

風雨

八月十一日夜四山風雨溪流暴漲東北村落
刈稻在田者以千餘家計聯結藁蕩去無餘粒
婦孺相率待死而已
劉子聞之作是詩也

吁嗟風雨何爲哉山農一夜驚喧逐秋成結藁田中堆
溪流噴湧如奔雷盡力捲去餘根荻抵死向前徒悲哀
皇天仁慈忍相摧倏忽豐年變爲災是何罪辜費疑猜
愚魯作惡原無材勤儉未必鍾禍胎東村血淚牽嬰孩

北村面色如土灰四十餘里沙石埋昨日空自歡顏開
謂天降罰無所逃千家百家呼天高謂天無心此偶爾
風雨之權誰所操深山大澤多鬼怪孽龍毒蛇盡爲害
安得旌陽許仙劍借我斬伐無餘羨安得昌黎韓子文
向彼告諭驅其羣學劍旣不成作文又無取徒自形詩
歌鬼怪笑予腐人盡皆怪難僕數強凌貴倨誰敢侮刀
鋸析楊逼囹圄彼實爲同類或且爲父母人具人心猶
相苦矧鬼怪爾不仁不義固其所多事多言乃有汝使
我聞之不敢茹亦復不敢吐第見孽龍毒蛇在旁喜而
舞

披星華初集

西山遠處夕陽寒草長墳頭土未乾四卷詩留琴鶴怨
百年人去楮煤殘斷魂未許燈前讀和淚祇宜酒後看
借得要離三尺劍愁腸割盡寸心寬

冷淚

枯骨遍山阿愁懷奈爾何熱腸天地少冷淚古今多鬼
哭如長嘯人歡自放歌可知千百載同是頃時過

對菊

壺觴易盡九秋天未向君王乞酒泉第一稱心何事是
青帘影射菊籬邊

一株花下一篇詩
露冷霜寒自不知
最惱落英餐欲盡
晚蟬聲送柳間遲

爛醉西風笑不休
出門一片水東流
相逢盡道人如菊
若箇辭封萬戶侯

山中閑行見蝶

野老無能不出山
是何仙種亦身閒
名園讓與人歌舞
遠在荒林野蔓間

惹草縈花媚夕暉
深閨兒女艷仙衣
團團小扇輕相撲
繫在釵頭不得飛

生長人間隘九州
無端遇物卽悲秋
願騎大蝶如騎鳳

海外神山處處遊

憶丙

老承姑訓自持家起聽雞鳴臥聽鴉白髮仍因鹽米累
秋深不暇對黃花

歲暮匆匆也製衣鄉村大雪不輕飛收糴材筒經三載
布色猶然新出機

出山歸對菊花作

暫攜筇竹別秋山江水自忙雲自閒半日詩情尋不著
歸來仍在菊花間

賦菊

長笑人凡物亦凡居山最好擇重巖胸無半卷詩宜廢
歲不三秋菊可茆幽谷種多兼赤白貧家餐久異酸鹹
帝王也重延年藥一束殷勤達寸函

讀當塗父子詩偶題

父子弟兄同一時建安體格至今知老臣二表參伊傅
名士原來不在詩

戲爲潘邠老責催租人

一年一九月九月一九日登高一騁望愁懷去若失采
菊采茱萸百歲却災疾風雨時相妒陰晴正難必尙冀
天公憐有詩萬事畢薄田今無收敢望食有飫忍餓輸

公家幸免官呵叱催租爾何人豈識八與七催租爾何
事闖然入我室

催租人責潘邠老

賦詩爾何人裳衣日顛倒賦詩爾何事吟哦忘衰老公
田與私田豐穰官爲禱秋成不催科何以署上考汝失
祇一詩如喪千金寶昨我入人家繫累及翁媪布帛恣
攜取驚鴨任懷抱常恐失我意卽惹官煩惱我與官一
身禍福由我造爾輩窮措大寒郊侶瘦島敗興敢妄言
匆匆欲定草鞭撲安幸免逃亡須及早

忽然得此二詩古之催租人德或不小矣

重陽前一日

羣山落木擁孤村對菊能招處士魂佳節每愁風雨妒
老年常苦別離煩但望送酒人臨徑不願催租吏到門
縱使登高無勝會頽然且自倒清尊

晚眺

暮靄蒼然到竹扉老牛背上擲蓑衣村兒不解吹長笛
斜抱松枝犢後歸

晴

荒村積雨謝交游獨醉黃花臥小樓明日定能高處望
夕陽已上樹梢頭

菊側見蠅

松竹清陰接翠微
長空雁影到門稀
蒼蠅自古秋來少
竟向黃花徑底飛

九日不出門

四山風雨一時收
如此新晴不出遊
可是崑崙元圃外
人間無處有高邱

茫茫天地亦生才
不耐天將玉樹埋
一自卽園人去後
昆華未見一詩來

出門

扶杖強出門山高
不十里草茨牽人衣
樹根礙人履年

衰少筋力五步輒一止本欲窮岩巖乍得平處喜矯首
青天上英英白雲起定有跨鶴人皎若周王子呼之無
聲應颺然去不已松風自北來引我出剡施遂覺置身
高烟雲在足底較量百尺樓何但數倍蕤忽憶幽居人
種菊雜種杞此時采盈把所苦無酒耳秋秫收十石我
釀多且旨便欲相逢迎脫巾且曳屣醉後好大言神仙
亦螻蟻何必登蓬萊食棗巨瓜比牛山多懦夫龍山有
豪士迴頭語弱孫嘯歌可沒齒

夕菊

赤鳥矯翼駐西山人與黃華喜見顏從此不須愁日暮

秋容自在夕陽間

重陽後一日得戴古村寄詩

登高才昨日望遠正傷神
形影餘今我乾坤幾故人
讀詩如握手拭淚盆沾巾
記得中秋夢昆華置此身

菊花吟

九月秋氣深萬類盡蕭索
草木更微物固宜歎零落
乃有叢菊花秀發殊自若
從容風霜間凜冽弗能虐
平時苟無得成就必劣弱
大造不私春端在力振作
尙恐性枯槁厖厖稱嚴整
神韻復天生風騷有寄託
對之可百日此中何不樂
惜哉貧賤人甘心就隕獲

對菊

節邁重陽菊未殘曾無賓客一來看得秋正氣原非易
與世輕交亦最難讀史傳從高士例詠懷詩越近時觀
許多草木皆如此笑煞西風枉自寒

村居

休將舊夢繞天涯客路多歧最易差故宅未能忘白屋
在城內新詩只是戀黃花茹蔬甘勝鹿爲脯扶杖穩逾牛
引車且與秋風閒倚徙西山正好送晴霞

三醉園爲楊嶰谷

浩浩乾坤兮於物無礙自小其身兮心乃不泰於此有

人兮飢渴無害寄意於酒兮如飲沆瀣一日三醉兮歲
月其邁精神天通兮體魄地載不交王侯兮且友乞丐
忽然仙境兮忽然佛界吾道自尊兮相視而笑中有我
在今初度不改戲名畫史兮汝無我怪惜非好手兮難
脫俗派出以示我兮我見而駭神情可異兮面目宜類
變化二三兮竟不一概與子相遇兮形骸之外與子相
忘兮畫圖之內子畫宜棄兮子醉無悔我如子瞻兮却
夢人醉

蓉渚贈圖

謂君惜我老此間老人自不少謂君憐我窮何嘗窮極

詩能工一見遂如故暫別輒相思
菰蘭作圖遠寄與荒
村落葉秋風時高張素壁手加額
仙宮秘玩難倖獲飛
來壺中九華山移到洞天一品石
青松百尺摩雲烟蒼
苔紅藥紛綿芊長橋不通衆車馬
巉岩深處鳴寒泉小
史丰態何婀娜挾策搖扇趨侍左
燕坐者誰幽且閒細
看鬚眉却似我我家有宅祇一區
樵山汲水無庸奴貧
兒暴富賤兒貴意氣直欲凌千夫
人間何地有此處那
得徑向圖中住一任冬去春復來
年年婆婆老松樹

後山聽松李翊清趙獻公適至

臥聽松聲半壑哀晴天不住響風雷
陶宏去久無人共

忽見半求二仲來

過抱孫樓

一層樓上客避地五經冬屢易應門犬猶存倚石松童
孫在何處老子見無從不復緣梯上臨窻問遠峯

同李翊清入山尋石不獲

結念青山上遙遙歷幾重鈎衣多亂石入袖少奇峯秘
玩猶難得神仙可易逢相將歸去晚四顧白雲封

夢龐人表

不夢三年久依依是昨宵未知生死信誰作異全謠講
學師曾孟逢時拜禹堯終難免凍餒風雨正瀟瀟

憶雁

歲歲長空有雁聲今年豈是不南征
琴臨北渚秋烟渺
枕倚南樓夜月明
愁緒盡銷纔絕念孤懷無著又多情
蜚蠊亦爲西風急併入詩中讓爾清

宜人生日

死十一月餘矣

生死亦常理愁緒固如結時事相感觸肝腸卽欲裂我
有同室人昨歲忽永訣未偕百年老已經及大壑我自
甘居鰥誰能遠同穴今茲降生日欲語先哽咽孤墳百
里外巖巒峙嶙峋念昔居室時爲愚不爲哲壽觴實同
舉兒孫侍成列相去未期月酒漿空前設一慟撫靈几

獨食累祝體愧彼太上人忘情義早欲生離倚心悲何
况是死別

夢李卽園論周林汲著作

我於歷城周太史平生風誼師友間林汲敗書二萬卷
著作亦復藏名山蒼華詩人有李子早夭名不出閭里
辨香固是少陵翁諷喻長慶兼厥美二子異道不異趨
要之各自馳聲譽昨宵握手弄霜月李也願爲周也徒
林汲久不入吾夢夢見卽園輒心痛何年昆深過墓門
相對秋風泣翁仲

閒望

萬里神京外南雲繞戶庭風霜盡生意天地四時青

喜馬子雲至

十月二十一日至九月二十二日自麗江來

玉龍山下客鬱鬱抱奇材忘記何年別驚傳此日來生
存便自好老醜不須哀却道逢長路多應姓氏猜
孤村移宅久鶴去少知音門徑埋塵厚庭階落葉深馳
驅千里路傾倒一生心問訊無端緒寒宵淚淫襟

牝雉篇

牝雉求雄狐暱好如鴛鴦冶容匪一狀妖態滿千方林
澤實慚愧孕育胡不祥傾家速訟獄生女堪悲傷天神
王風化作事殊顛狂藉山及天葉雉狐任飛揚曾道懷

歸妹風人刺齊襄姁娥據漢宮乃侯張辟疆人情恣所欲
天理反其常天神爾何人公孫氏繁昌九霄掇科目
一技工詞章詢年及耄耄竟不身先亡笑罵及童豎猶
自矜循良我今歌此曲欲求麟鳳凰爲我愬天帝帝道
如弓張

祿位牌

一段青松栗主祠上仰旁拱刻螭二中平施采作金字
大書某氏子祿位某氏治生善言利寡嫂配叔強解事
絕產設學亦名義師弟束修恃有備感恩頌德師長技
伐石南山勒好記朔望衣冠每長揖春秋相要首至地

師固自負一鄉萃毋乃姑與爲游戲不顧旁人罵復言
有一儒生笑而諍投之水水有清波焚之林林有美柯
汚水辱林將柰何此間捕役賊能禦急呼之來莫躊躇
一條鐵索曳以去

夜夢題西征圖云胡笳吹徹玉門關降甲堆齊瀚
海間壯士賦歸春雪少一時齊著錦衣還醒後
作

自揣封侯骨相慳文場冷落戰場閒北風不管磨崖事
雨雪深埋塞外山

憶卽園寄蓉渚

四五千年幾作家才人哭罷哭蒼華今秋幸得成都客
時向雲端駐使車

沈節婦

事夫以節貴能守事親以孝戒無後於斯二者無一虧
汪家女子沈家婦陋邦那得此人物毋乃名門福澤厚
百年自幸偕好述牛道忽驚喪嘉耦御輪曾無匹馬辱
結襦肯因二禽詆傷心碧血埋黃泉矢志紅顏到白首
當時死者如再生笑趨高堂敬爲壽祇此苦節已難得
卓識莊論更不朽爲翁急取兩側室先子生孫世綿久
忍教雞犬鳳麟雜敢使螟蛉蜾蠃負翩翩兩鵠翔雲霄

矯矯孤鸞耀星斗鄙人游覽半天下木表石坊樹道右
儘多完節稱淑媛豈少撫孤作賢母中間或有隨俗人
不立主見逐人走一心但從似續計遑辨紫朱與苗莠
抱兒贅壻皆爲之非類難調衆人口維節則然孝則否
如此姬姜未易有

草堂梅花

深林雨雪欲來時望影聞香醉不辭自愛吾廬先滿院
却看鄰舍尙空枝冬心同是抱孤樹春意獨經催小詩
造物亦憐人繾綣寒風昨夜赴前期

同馬子雲李翊清舊草堂側尋梅未開

長憶寒梅樹高枝擬其攀一林堆落葉半日坐空山歲
暖雪猶秣村孤雲自閒更隨流水去憑弔小橋間

梅花

不曾作冶傍梅根且喜花開客在門要使人皆知老樹
休教我獨賦荒園隨風木葉從他萎擲地文章借此爲
可惜舊籠雙鶴去徒留明月照清樽

歲暮天寒始見奇羞從俗客寄相思羣山踏遍無多樹
老木僵餘有一枝不用意間偏出色到忘言處竟如癡
梅花與我同惆悵忍凍孤吟欲雪時

過李翊清書屋看梅花

從容濯魄卽冰壺。和月和烟嗜好殊。雨雪未來香自冷。
雲山可伴影猶孤。詩非囑疆難求肖。畫不高閑枉作圖。
閱盡春花千萬樹。始知似此一枝無。

送馬子雲赴昆明

未能聯轡上昆明。村舍聞雞送客情。一月梅花香裏住。

幾回榭葉影邊行。正風舊識二王學。

新城漁洋兄弟

古調新知

三李名

高密少鶴兄弟

此去如逢人吐鳳。

楊蓉渚大令

不妨金碧滯

歸程

子雲將出門。小立梅花樹下。

梅花香未歇。借此可淹留。投舍夕陽外。出門初日頭。道

傍多散木湖上有虛舟最喜無干謁平生只漫遊

子雲歸後却寄

關山幾千里到此計旬三人老朝遲起天寒夜倦談師
資既無所交道亦何堪昨日窺君意艱難獨覺甘
虛聲人不識往往遠方來嚙語成詩卷空筵索酒杯齋
心忘肉味焦尾少琴材試問五都市幾人空手回
見來聞去後相戒入荒村哭石偏多淚招梅尙有魂何
干嘉客事休信妄人言渺渺飛鴻影誰留爪雪痕
高士麗江產雪山千里明縱然思老子未足事長征我
欲乘雲去君先帶月行玉湖殘夜影入夢亦移情

再過西鄰看梅花

留得寒梅歷幾時
樂遊何必好臺池
閒中客欲常依樹
空際花如不附枝
西嶺枯根潛翠蘚
東園朽壤聚羣狸
望衡對宇無他處
敢爲衰年恡小詩

覽徧名園此輒倫
未知何物是前身
橫條直幹皆如意
暖日寒烟各有神
歸去尙攜香滿袖
夢來仍覺影橫巾
學仙不死無奢願
長作梅花樹底人

又過東鄰看梅花

多事仙家鶴應門
履聲杖影直憑軒
千花競出都難並
一樹齊開不覺繁
隔屋烟雲醒俗夢
過牆蜂蝶役清魂

如何十日無人問
雜沓城頭笑語喧

答楊嶰谷

天下英才盡出羣
年經大耋獨無聞
看驢古道馳斜月
聽雁長空叫斷雲
詩酒祇爲娛老計
山林未作送窮文
難禁死別生離淚
白水紅冰兩不分

嶰谷來詩有言詩人漸老西河之語讀之泣下覺杜甫懷李白何時一尊酒重與細論文自是少壯人相思語無此沈痛也

山中看梅花

一樹花殘一樹開
如何人不費詩材
是多情處原難捨
卽甚忙時亦自來
未到行窩心早嚮
已循歸徑首猶回

茫茫雨雪寒山裏爲問羣芳可似梅

寄別楊蓉渚

恨不能飛去離亭酒共斟梅殘還折柳淚住更傷心序
次新詩卷廻翔古翰林願將身化雪孤館照長吟

招五弟七弟及羽清看梅花

獨賦梅花未出奇翩翩羣秀各能詩相迎一路風烟裏
對坐孤邨雨雪時亦有南山愁外見正如春草夢中知
西鄰又得挈雲手咫尺泥塗更不疑

戲柬

沈吟想已久成詩蠟燭燒殘見跋時已覺少陵看去早

多因和靖到來遲風花原是無心得文字何須用意爲
若使三年才一句寒山開落幾千枝

憶南村茶花

不有仙人借鶴騎尋常草木亦難窺夢中忽赴南山約
看遍茶花一萬枝

寄戴古村

歸臥深山久懷君入夢遲風騷不到處雨雪欲來時一
夜梅花發千秋處士知無因相寄與獨自強吟詩

憶卽園

一片多情土長埋李謫仙詩人原有用造物總無權空

下蒼生淚徒留百代編交游如我輩好惡尙疑偏

古村來書再三致意修竹梅花因答一詩

四愁五噫恨難刪多少歡愉變在顏一代文章如逝水
幾家著作在名山殘年獨坐尋詩懶長夜孤眠憶夢閒
多謝九龍池上客梅花修竹總相關

立春日對梅花

春已到人家香清影復斜當前無衆木此後有羣花雪
淨誰相曜煙輕任自遮故人時一至不獨醉流霞

讀韋廬詩集

不死空山福有餘船山讀罷讀廬韋仙家懶授長生訣

負盡人間未見書

子雲寄時憲書至感賦

援時書不至幾欲忘春秋老少憑人說榮枯得自由爲
龍不爲鼠呼馬或呼牛甲子從君識無端笑白頭

門前梅花

一樹開何晚疎枝遂獨存老依吾輩宇懶傍別人門詩
思遲猶拙琴心淡不喧每當朝日起待攬晚煙痕